

# Repke Tepke Limburgs kampioen zate hermeniekes



Onvöörstelbaar. Nao ein spetterendj en knallendj optraeje zeen weer gisteraovendj oetverkaoze tot: Limburgs kampioen zate hermeniekes!

Zoaget is ech ongeluifelijk. De bèste van Limburg....en auch nog de publiekspries!

## Het prille begin

Nao oos oprichting in 2001 en ooze ieëste Vastelaovendj höbbe weer flink aan de waeg getömmertj. In 2002 höbbe weer den auch al deil genomme aan het LKZH 2002 in Beeg, georganiseerdj door de Roepepers. Diej zagte: 'jonges, es weer uch zeen den dènke weer aan oszelf toen weer begooste. Geer zoewtj waal èns wuud kènne komme'. En det is oetgekemme.

De LKZH aovendj woor onbesjriefelijk. Weer woore es 11dje oetgelaotj en de stömming zoot d'r enorm good in. Het woor baeregezellig en waat ein enthousiasme! Het optraeje woor knallendj en flitsendj. De zaal ging prachtig mit op oos nummers. Es ieëste höbbe weer de intro 'Pierre Sjeetgewaes' (Peter Gun) gespeeldj om effe lekker werm te drèjje. Het zwaor wèrk sjäördje wiej vanouds en het lich werk flitsdje deräöverhaer. Vervolgens zeen w'r verder gegange mit het alom bekèndje 'Country Roads'. Daonao de echte Limburgse meziek: 'Greumelevlaai!' Ha-le-luja sjrieëfdje het publiek. Greumelevlaai! Het klonk van vöör in de tent tot achter en weer terök. Auch de greumelevlaai diej oet waardje gedeiltj ging d'r good in.

Nao deze klapper höbbe weer 'de Sjlaag om de Koppeleberg' gespeeldj. De trompetten pitsdje de noate deroet en het ging geweldig. Mer:

weer hawwe nog gein sjonkelnummer gespeeldj. Dus: 'de Sjoon van Mozes' pasdje hiej perfek in. De zaal sjonkeldje van lènks nao recht en ich mein gezeen te höbbe det zelf de jury mitsjonkeldje. Es aafsloeter höbbe weer nog de bekèndje Sirtaki gespeeldj. En de tøjere vlooge letterlijk door de zaal haer. Waat ein genot!

Helaas woor oos kwarteer om, want weer hèjje nog vööl langer door kènne gaon. De tune klonk en dit jaor höbbe weer mer èns neet hiejin doorgespeeldj. En det haef gewèrkjt!

## De priesoetreiking

De priesoetreiking woor den dao... zoew het den? Nae, det kan neet! Het zal waal eine 4dje pries waere. Mer toen. De publiekspries is vöör.... Repke Tepke! Weer sjrieëfdje het oet en de polonaise waardje alweer getroch. Waaw de publiekspries. Dae is mesjiens nog waal sjooner es..de ieëste plaats! De aovendj koos al neet mië stök.

Mer toen: de 4dje plaatse woore al oetgereiktj. En weer woore nog steeds in de running! Onvöörstelbaar: 3dje, 2dje of 1ste. Det is toch neet vöör mäogelijk te haoje. En toen woore d'r opèns nog 2 äöver! Het woor z'n sjoan moment toen bleek det weer gewonne hawwe. W'r ginge hiëlemaal los en kooste os gelök neet op. Repke Tepke...Limburgs Kampioen Zate Hermeniekes 2006. Waem haw det noe verwach? Het aafsloetendj optraeje ging auch geweldig. Weer woore door het doller haer en höbbe os hiëlemaal gegaeve. Eederein dae altied vöör os klaor haef gestange: bedanktj. En tot slot: Limburg bedanktj...!